

四庫全書

子部

欽定四庫全書

冊府元龜卷七百七十六 宋 王欽若等 撰

總錄部

名望

夫爲萬物之靈稟五行之秀而不能馳聲於當年揚名於沒世者奚足謂之賢哉故有德美淵騫英華發越扶義倜儻懷才超拔志節抗邁公廉絕俗經術深厚風裁詳雅由茲而稱於儕伍聞於州里著於官次顯於朝廷

布於天下流於絕域者蓋有之焉其或同時接武齊名並駕爲游談之矜式聳士類之慕向傳所謂死而不朽者皆是之謂歟

子產鄭人簡公二十三年諸公子爭寵相殺又欲殺子產公子或諫曰子產仁人鄭所以存者子產也勿殺乃止

澹臺滅明事孔子既以受業南游至江從弟子三百人設取予去就名施乎諸侯

晏平仲嬰者萊之夷維人也事齊靈公莊公景公三世顯名於諸侯

越范蠡三徙成名於天下非苟去而已所止必成名卒老死於陶故世傳曰陶朱公

吳起衛人魏武侯封起爲西河守甚有聲名

甘茂下蔡人起下蔡閭顯名諸侯

漢張耳陳餘皆大梁人張耳少時爲魏公子無忌客與陳餘兩人魏之名士也陳涉起斬至陳張耳陳餘上謁

涉上謁若今涉及左右生平數聞耳餘賢未嘗見即

大喜

陸賈勸陳平交驩太尉周勃以此游漢廷公卿間

廷謂朝廷

名聲藉甚

言狼藉甚盛

孝文即位爲大中大夫

季布楚人也布弟季心聲聞關中嘗殺人亡吳從爰絲

匿長事爰絲

言以兄長之禮事也

弟畜灌夫籍福之屬嘗爲中司

馬

中尉司馬

中尉郅都不敢加少年多時竊借其名以行

詐自

稱爲心之賓客徒黨也

當是時季心以勇聞布以諾聞關中後爲

河東守

韓安國爲人多大畧知足當世取舍

舍止也取舍言可取則取可舍則舍

而出於忠厚貪財利然所推舉皆廉士賢於已者於梁

舉壺遂臧固至它皆天下名士

於梁舉二人至於他邑所舉皆名士也

亦以此稱慕之惟天子以爲國器官至御史大夫

鄭當時字莊陳人也脫張羽於阬

梁孝王將楚祖之弟也

聲聞梁

楚間後爲大司農未嘗名吏與官屬言若恐傷之聞人之善言進之上惟恐後山東諸公以此翕然稱鄭莊

鄒陽齊人與吳嚴忌牧乘等俱仕吳皆以文辯著名爲
梁上客而卒

灌夫字仲孺潁陰人吳楚反時夫父孟爲校尉戰死夫
不肯隨喪歸奮曰願取吳王若將軍頭以報父讐於是
乃從奴十餘騎入吳軍至戲下亡其奴獨與一騎歸夫
身中大創十餘適有萬金良藥故得無死創少瘳又請
復往將軍壯而義之恐亡夫乃言太尉太尉周勃也太尉固
止之吳軍破夫以此名聞天下後至燕相

漢李陵少爲侍中建章監善騎射愛人謙下士甚得名譽

楊惲司馬遷外孫也以材能稱好交英俊諸儒名顯朝廷官至光祿勳

尹翁歸爲政雖任刑其在公卿之間清潔自守語不及私然溫良謙退不以行能驕人甚得名譽於朝廷爲右扶風病卒

辛慶忌遷校尉將吏士屯馬者國還爲謁者尚未知名

元帝初補金城長史舉茂材遷郎中車騎將軍朝廷多
重之者補為校尉遷張掖太守徙酒泉所在著名

雋不疑治春秋為郡文學進退以禮名聞州郡官至京

兆尹

趙廣漢為潁川太守威名流聞匈奴降者言匈奴中皆

聞廣漢名

酈曼容漢兄之子也亦養志自修其名過出於漢官至
六百石輒免去

樓護字君卿爲京兆吏甚得名譽護爲人短小精辯論
議嘗依名節與谷永俱爲五侯上客長安號曰谷子雲
之筆札樓君卿之唇舌護官至天水太守永至大司農
杜欽字子夏少好經書家富而目偏盲故不好爲吏茂
陵杜鄴與欽同姓字俱以材能稱京師故衣冠謂欽爲
盲杜子夏以相別欽惡以疾見詆廼爲小冠高廣才三
寸才與繞同由是京師更謂欽爲小冠杜子夏而鄴爲大冠
杜子夏欽不仕鄴官至涼州刺史

龔勝字君賓龔舍字君情皆楚人也兩人相友並著名節故世謂之楚兩龔勝官至光祿大夫舍亦至光祿大夫稱病不起

楊雄少時從嚴君平游巨而仕京師顯名除爲郎給事黃門

紀遠王思琅邠人薛方子容齊人郇越呂仲郇相稚賓太原人唐林子高唐尊伯高沛郡人皆成帝至王莽時清名之士也皆以明經飭行顯名於世

飭謹也

陳遵字孟公少與張竦相親友哀帝之末俱著名字爲

後進冠

爲後進人之冠首也

所到衣冠懷之惟恐在後時列侯有

與遵同姓字者每至入門曰陳孟公坐中莫不震動既至而非因號其人曰陳驚坐遵官至河內都尉

後漢張湛自太子太傅退居中東門侯舍故時人號曰

東門君

承宮爲左中郎將名播匈奴時北單于遣使求得見宮明帝勅自整飾宮對曰夷狄眩名非識實者也臣狀醜

不可以示遠宜選有威容者帝乃以大鴻臚魏應代之
祭彤子孫多爲邊吏者皆有名稱

崔駰少游太學與班固傅毅同時齊名官至長岑長

馮豹好儒學以詩春秋教麗山鄉里爲之語曰道德彬
彬馮仲文位至尚書

卓茂與同縣孔休陳留蔡勳安衆劉宣楚國龔勝上黨
鮑宣六人同志不仕王莽時並名重當時光武即位以
爲太傅

王扶爲議郎有節行臨邑侯劉復著漢德頌盛稱扶爲
名臣

第五種字與先少勵志義爲吏冠名州郡官至兗州刺
史

李咸字元貞汝南人累經州郡以廉幹知名在朝清忠
權倖憚之

鄧彪字智伯與同郡宗武伯翟敬伯陳綏伯張弟伯同
志好齊名南陽號曰五伯彪位至太傅錄尚書事

栢彬字彥林少與蔡邕齊名舉孝廉拜尚書郎

名馴儻不拘小節以志義聞鄉里號之曰德行恂恂
召伯春仕至光祿勳

樓望操節清白著稱鄉里仕至左中郎將

周澤字稚都孫堪字子稚堪行類於澤故京師號曰二
稚澤位至太常堪至侍中騎都尉

韓融少能辯理而不爲章句學聲名甚盛五府並辟位
至太僕

荀爽字慈明耽思經史慶弔不行徵命不應潁川爲之
語曰荀氏八龍慈明無雙後遭黨錮隱於海上又南遁
漢濱積十餘言以著述爲事遂稱爲碩儒位至司空
袁閻字奉高數辭公府之命不修異操而致名當時
金元休名尚京兆人與同郡韋休甫第五文休俱著名
號爲三休尚獻帝初爲兗州刺史東之郡而魏太祖已
臨兗州尚依袁術術僭號欲以尚爲太尉不敢顯言私
使諷之術亦不敢強也建安初尚逃還爲術所害

黃香博學經典究精道術能文章京師號曰天下無雙
江夏黃童官至魏郡太守

矯慎隱遁山谷與馬融蘇章鄉里並時融以才博顯名
章以廉貞爲稱然皆推先慎

賈彪少游京師志節慷慨與同郡荀爽齊名後至新息
長

董扶少游太學與鄉人任安齊名仕至蜀郡屬國都尉
侯瑾嘗以禮自牧徵召不到覃思著述西河人敬其才

而不敢名之皆稱為侯君公車徵不至

蘇純字栢公有高名性強勁而持毀譽士友咸憚之至
乃相謂曰見蘇栢公患其教責人不見又思之三輔號

為大人

大人長者之稱尊信者也

仕至南陽太守

何顯少游學雒陽顯雖後進而郭林宗賈偉節等與之
相好顯名太學後辟司空府

郭泰字林宗太原介休人也不應辟召桓帝時太學諸
生三萬餘人郭林宗賈偉節為其冠與李膺陳蕃王暢

更相褒重學中諸生曰天下模楷李元禮不畏強禦陳仲舉天下俊秀王叔茂海內希風之流遂共相標榜指天下名士爲之稱號上曰三君次曰八俊次曰八顧次曰八及次曰八厨猶古之八元八愷也竇武劉淑陳蕃爲三君君者言一世之所宗也李膺荀昱杜密王暢劉祐魏朗趙典朱寓爲八俊俊者言人之英也郭林宗宗慈巴蕭夏馥范滂尹勲蔡衍羊陟爲八顧顧者言能以德行引人者也張儉岑暉劉表陳翔孔昱范康檀敷翟

超爲八及及者言其能導人追宗者也度尚張邈王孝
劉儒胡母班秦周蕃向何王章爲八厨厨者言能以財
救人者也

劉表字景升山陽人少知名號八俊仕至荊州牧

張璠漢紀

曰表與同郡人張隱薛郁王訪宣靖公褚恭劉祇田林
爲八交或謂之八顧漢末名士錄云表與汝南陳翔字
仲慶范滂字孟博魯國孔昱字世元渤海范康字仲貞
山陽檀敷字文友張儉字元節南陽岑暉字公孝爲八
友胡母班字季皮太山人少與山陽度尚東平張
邈等八人並輕財赴義振濟人士世謂之八厨

李膺爲司隸校尉是時朝廷日亂紀綱頽弛膺獨持風

裁以聲名自高士有被其容接者名爲登龍門

鍾瑾李膺姑子好學慕名有退讓風與膺同年俱有聲名辟州府未嘗屈志

杜密轉太僕黨事既起免歸本郡與李膺俱坐而名行

相次故時人亦稱李杜馬

前有李固杜喬故言亦也

竇武少以經行著稱嘗教授於大澤中不交時事名顯關西後至大將軍

鍾浩潁川長社人時郡中先輩爲海內所歸者蒼梧太

守定陵陳稚叔黎陽令頽陰荀淑及皓少府李膺嘗宗
此三人曰荀君清識難尚陳鍾至德可師淑至朗陵侯
相棄官歸皓累徵不就

陳實與子紀高名並著而紀弟湛又配之世號曰三君
每宰府辟命率皆同時羔雁成羣承掾交至豫州百姓
皆圖畫實紀湛之形象實至太邱長紀至大鴻臚

湛史
不載

官

段紀明武威姑臧人與皇甫威明張然明並知名顯達

京師稱爲涼州三明云

任安字定祖少游太學受孟氏易兼通數經又從同郡楊厚學圖識究極其術時人稱曰欲知仲桓問任安又曰居今行古任定祖

趙壹舉郡上計到京師河南尹羊陟與司徒袁逢共稱薦之名動京師士大夫想望其風采十辟公府不就

王烈通識達道秉義不回以潁川陳大兵爲師二子爲友時潁川荀慈明賈偉節李元禮韓元長皆就陳君學

見烈器業過人歎服所履亦與相親由是英名著於海
內

孔融與平原陶邱洪陳留邊讓並以俊秀爲後進冠蓋
融持論經理不及讓等而逸才宏博過之融官至少府
大中大夫洪辟太尉府讓至九江太守

魏李豐字安國故衛尉李義子也文帝時以父任召隨
軍始爲白衣時年十七八在鄴下名爲清白識別人物
海內翕然莫不注意後隨軍在許昌聲稱日隆其父不

願其然遂令閉門勅使斷客明帝在東宮豐在文學中
及即尊位得東吳降人問江東聞名士爲誰降人云聞
有李安國者是時豐爲黃門郎明帝問左右所在左右
以豐對帝曰豐名乃被於吳越邪位至中書令

華歆平原人與北海邴原管寧俱游三人相善時人號
三人爲一龍歆爲龍頭原爲龍腹寧爲龍尾歆至太尉
原至五官將長史寧至大中大夫固辭不受

張泰鉅鹿人爲鴻臚龐迪扶風人爲河南尹以清賢稱

荀綽冀州記曰鉅鹿張邈字卻虎祖父泰字伯陽有名於魏父儼字叔連為遠東太守著自然好學論在嵇康集為人宏深有遠識恢恢然使求之者莫之能測也官歷二守後為城陽太守未行而卒

邢顥字子昂太祖辟為冀州從事時人稱之曰德行堂堂邢子昂位至太常

徐宣字寶堅廣陵海西人避亂江東又辭孫策之命還本郡與陳矯並為綱紀二人齊名而私好不協然俱見器於太守陳登位至侍中光祿大夫

鮑勛清白有高節知名於世後至宮正

趙儼潁川陽翟人與同郡辛毗陳羣杜襲並知名號曰
辛陳杜趙云毗官至衛尉羣儼並至司空襲至尚書大
中大夫

滿寵字子偉以格度知名官至衛尉

徐邈同郡韓觀曼游有鑒識器幹與邈齊名而在孫禮
盧毓先邈位至司隸校尉

王昶字文舒太原晉陽人也少與同郡王浚俱知名浚
年長昶兄事之位至司空

韓暨爲大鴻臚暨爲大賢韓宣在後爲鴻臚亦稱職故
鴻臚中爲之語曰大鴻臚小鴻臚前後治行曷相如

沐並字德信爲三府長史時吳使朱然諸葛瑾攻圍樊
城遣舡兵於峴山東斫材牂牁兵人作食有先熟者呼
後熟者言共食來後熟者答曰不也呼者曰汝欲作沐
德信邪其名流布播於異域如此雖自華夏不知者以爲
前世人也

蜀習禎字文祥襄陽人有風流善談論名亞龐統而在

金史四十八卷
卷七百七十六
馬良之右子忠亦有名仕至南廣漢太守

蔣琬字公琰零陵湘鄉人弱冠與外弟泉陵劉敏俱知名琬至大司馬敏至右護軍

費禕字文偉江夏邠人與汝南許叔龍南郡董允齊名禕位至大將軍允侍中守尚書令

楊戲字文然犍爲武陽人少與巴西程祁公引巴郡楊汰李儒蜀郡張表伯達並知名戲每推祁以爲冠首丞相諸葛亮深器之仕至射聲校尉

姜維字伯約爲大將軍時蜀官皆天下英俊無出維右
吳徐陵字元大爲零陵太守朝廷待以列卿之位故虞
翻與書曰元大受上卿之遇叔向在晉未若於今其見
重如此

周瑜時年二十四吳中皆呼爲周郎後至偏將軍領南
郡太守

顧邵字孝則博覽書傳好樂人倫少與舅陸績齊名而
陸遜張敦朴靜皆亞焉邵仕至豫章太守績至偏將軍

遜至丞相敦至海昏令靜至剡令

步騭字子山大帝爲討虜將軍召爲主記歲餘騭以疾免與琅邪諸葛瑾彭城嚴峻俱游吳中並著聲名爲當時英俊位至驃騎將軍領冀州牧

顧譚爲太子友時四方之傑畢集太傅諸葛恪以雄竒蓋衆而譚以清識絕倫獨見推重自太尉范慎謝景羊徽之徒皆以秀稱其名而悉在譚下位至太常

晉應貞字吉甫善談論以才學稱夏侯元有盛名貞詣

元元甚重之位至散騎常侍

鄒湛字潤甫以才學知名爲征南從事中郎深爲羊祜所器重

胡威字伯武一名貌貅淮南壽春人父質以忠清著稱少與鄉人蔣濟朱績俱知名於江淮間官至青州刺史何曾字頻考陳國陽夏人父蕞魏太僕陽武亭侯曾少襲爵好學博聞與同郡袁侃齊名曾位至太宰侍中侃至尚書

歐陽建字堅石世爲冀方右族雅有理思才藻富贍擅名北州時人爲之語曰勃海赫赫歐陽堅石仕至馮翊太守

石浚字景倫清儉有鑒識敬愛人物位至黃門侍郎爲當世名士

傅祇字子莊父嘏魏太常祇性至孝早知名以才識明練稱位至侍中遷司徒不拜

劉毅幼有孝行少厲清節然好臧否人物王公貴人望

風憚之位至尚書僕射光祿大夫

裴憲爲侍中王浚承制以爲尚書陷石勒爲右光祿大夫司徒太傅封安定郡公憲歷官無幹績之稱然在朝元默未嘗以物務經懷但德重名高動見尊禮

王罕字子綸愷子也幼有門風才望不及愷以淑行致稱爲清平佳士

和嶠少有風格慕夏侯元之爲人厚自崇重有盛名於世朝野許其能整風俗理人倫位至尚書令

王濟字武子少有逸才風姿英爽氣蓋一時好弓馬勇
力甚絕人善易及莊老文詞俊茂伎藝過人有名當世
與姊夫和嶠及裴楷齊名位至侍中河南尹

秦秀字元良少敦學行以忠直知名終於博士

華嶠字叔駿才學深博少有令名位至秘書監散騎常
侍

山簡濤之子也性溫雅有父風後與譙國嵇紹沛郡劉
謨宏農楊淮齊名位至征南將軍鎮襄陽

王元行之子少慕簡曠亦有俊才與衛玠齊名元行為
陳留太守玠後至太子洗馬

荀闓字道明亦有名稱京都謂之語曰雒中英英荀道
明

羊曼任達類縱好飲酒温嶠庾亮阮放栢彛同志友善
並為中興名士時州里稱陳留阮放為宏伯高平郝鑿
為方伯泰山胡母輔之為達伯濟陰卞壺為裁伯陳留
蔡謨為郎伯阮孚為誕伯高平劉綏為委伯而曼為黯

伯凡八人號克州八宿蓋擬古之八雋也曼位至前將
軍放至揚威將軍交州刺史鑒至太尉輔之至揚武將
軍湘州刺史壺至領軍將軍謨至司徒不拜孚至鎮南
將軍廣州刺史綏至荊州刺史

江統字應元靜默有遠志時人為之語曰嶷然稀言江
應元與鄉人蔡克俱知名位至黃門侍郎散騎常侍

劉與字慶孫雋朗有才局與弟琨並尚書郭奕之甥名
著當時京師為之語曰雋中奕奕慶孫越石與官至穎

川太守琨官至司空廣武侯

祖逖字士雅博覽書記該涉古今往來京師見者謂逖有贊世才具官至豫州刺史

華軼字彥夏少有才氣聞於當世汎愛博納衆論美之官至江州刺史

劉琨少得雋朗之名與范陽祖納俱以雄豪著名琨位至司空納至光祿大夫

劉眈字敬道少有行檢以義尚流稱為宗族所推位至

特進金紫光祿大夫

周馥字祖宣浚從父弟也父黈安平太守馥少與友人成公簡齊名俱起家為諸王文學

裴楷字叔則明悟有識量弱冠知名尤精老易少與王戎齊名位至光祿大夫開府儀同三司戎至司徒

裴秀少好學有風操八歲能屬文時人為之語曰後進領袖有裴秀裴王二族盛於魏晉之世時人以為八裴方八王徽比王祥楷比王衍康比王綏綽比王澄璿比

王敦遐比王導顧比王戎邈比王元秀位至司空

顧榮字彥先吳國吳人爲南士著姓祖雍吳丞相父穆
宜都太守榮機神穎悟弱冠仕吳爲黃門侍郎太子輔
義都尉吳平與陸機兄弟同入雒時人號爲三俊例拜
爲郎中

徐邈姿性端雅勤行勵學博涉多聞少與鄉人臧壽齊
名後至驍騎將軍

諸葛恢字道明潁川荀闔字道明陳留蔡謨字道明與

恢俱有名譽號曰中興三明時人爲之語曰京都三明
各有名蔡氏儒雅荀葛清恢位至侍中金紫光祿大夫
薛兼字令長丹陽人父瑩有名吳朝吳平爲散騎常侍
兼清素有器宇少與同郡紀瞻廣陵閔鴻吳郡顧榮會
稽賀循齊名號爲五俊初入雒司空張華見而竒之曰
皆南金也兼瞻並位至散騎常侍鴻仕吳至尚書榮至
鎮東軍司散騎常侍循至太常

褚斐字謀遠以才藝擢幹稱襲爵關內侯

張輔字世偉南陽西鄂人漢河間相衡之後也少有幹局與後母兄劉喬齊名輔爲馮翊太守喬至豫州刺史索靖字幼安敦煌人官至游擊將軍靖少有逸羣之量與鄉人汜哀張旭索紒索永俱詣太學馳名海內號稱敦煌五龍

牽秀字成叔武邑觀津人也祖招魏雁門太守秀博辯有文才性豪俠弱冠得美名爲太保衛瓘尚書崔洪所知秀位至中書令

衛瓘貞靜有名理以明識清允稱位至太保

裴頠爲人宏雅有遠識博學稽古履行高整自少知名
位至尚書僕射

荀羨字令則崧之子清和有準年十五尚尋陽公主拜
駙馬都尉弱冠與琅邪王齊名

周顛少有重名廣陵戴若思東南之美舉秀才入雒素
聞顛名往候之終生而不敢顯其才辯位至護軍將

軍

祖約逝之弟永嘉未隨逝過江元帝稱制引爲掾屬與
陳留阮孚齊名位至右將軍散騎常侍

胡母輔之與王龍王敦庾敳俱爲太尉王衍所昵號曰
四友

譙獻之巴西南充人有重名於西土

衛玠字叔寶風神秀異玠妻父樂廣有海內重名議者
以爲婦翁冰清女壻玉潤玠好言元理王澄及王元王
濟並有盛名然皆出玠下世云王家三子不如衛家一

兒於時中興名士惟王承及玠爲當時第一玠官至太子洗馬

王承字安期湛之子也弱冠知名太尉王衍雅貴異之比南陽樂廣爲東海太守去官東渡江及至建業爲元帝鎮東府從事中郎甚見優禮承少有重譽而推誠接物盡宏恕之理故衆咸親愛焉渡江名臣王道衛玠周顛庾亮之徒皆出其下

王謐字雅遠有美譽與譙國栢喬王綏齊名位至侍中

揚州刺史

周玘字宣佩強毅沉斷有父風而文學不及閉門潔已
不妄交游士友咸望風敬憚焉故名重一方位至建武
將軍南郡太守

庾冰字季堅兄亮以名德流訓冰以雅素垂風諸弟相
率莫不好禮爲世論所重亮常以爲庾氏之寶冰位至
車騎將軍江州刺史

孔愉字敬康與同郡張茂字偉康丁潭字世康齊名時

人號曰會稽三康愉位至鎮軍會稽內史

周密字泰元性虛簡時人稱爲清士位至尚書郎

孔衍宗人夷吾有美名博學不及衍涉世聲譽過之元帝以爲主簿

王坦之字文度弱冠與却超俱有重名時人爲之語曰盛德絕倫却嘉賓江東獨步王文度嘉賓超小字也坦之仕至北中郎將徐兗二州刺史超至司徒左長史

王忱字元達弱冠知名與王恂俱流譽一時厯位驃騎

長史嘗造其舅范甯與張元相遇甯使與元語元正坐
斂衽待其有發忱竟不與言元失望便去甯讓忱曰張
元吳中之秀何不與語忱笑曰張祖希欲相識自可見
詣甯謂曰卿風流俊望真後來之秀忱曰不有此舅焉
有此甥既而甯使報元元東帶造之始爲賓主忱位至
建武將軍

龔壯字子瑋巴西人也潔已自守與鄉人譙秀齊名不
仕而卒

褚裒少有簡貴之風與京兆杜乂俱有名冠於中興位
至衛將軍徐兗二州刺史

謝韶字穆度方之子少有名時謝氏尤彥秀者稱封胡
羯末封謂韶胡謂朗羯謂玄末謂川皆其小字也韶位
至車騎司馬朗至東陽太守玄至左將軍川早卒

謝安寓居會稽累辟不就時安弟萬爲西中郎將總藩
任之重安雖處衡門其名猶出萬之右自然有公輔之
望處家常以儀範訓子弟能爲雒下書生詠有鼻疾故

其音濁名流愛其詠而不能及或掩鼻以效之位至太保

袁宏有三子其季曰明子有父風最知名官至臨賀太守

謝玄為會稽內史時吳興太守晉寧侯張玄之亦以才學顯自吏部尚書與玄同年之郡而玄之名亞於玄時人稱為南北二玄論者美之

習鑿齒字彥威襄陽人也少有志氣博學洽聞以文章

金史四八
卷七百七十六
著稱後至荊州別駕

孔沉與魏顓虞球虞存謝奉並爲四族之後

王珉爲侍中代王獻之爲長兼中書令二人素齊名世謂獻之爲大令珉爲小令

却僧施字惠脫襲爵南昌公弱冠與王總綏栢裔齊名累居清顯仕至南蠻校尉

吳隱之字處默美姿容善談論博涉文史以儒雅標名位至光祿大夫加金章紫綬

單裔爲征西長史遂顯於朝廷時惟單與吳隱之以寒素博學知名於世

王恭字孝伯少有美譽清操過人自負才地高華常有宰輔之望與王忱齊名友善慕劉惔之爲人謝安常曰王恭人地可以爲將來伯舅位至北平將軍兗青二州刺史

宋謝莊少有美才文帝元嘉二十七年魏寇彭城魏遣尚書李孝伯來使與鎮軍長史張暢共語孝伯訪問莊

及王徽其名聲遠布如此後莊爲中書令金紫光祿大夫

王景文美風姿好言理少與陳郡謝莊齊名位至中書監領太子太傅

謝超宗陳陽夏人也祖靈運臨川內史父鳳元嘉中坐靈運事同徙領南早卒超宗元嘉末得還與惠休道人來往好學有文辭盛得名譽仕至臨川太守

袁覲好學善屬文有清譽於世官至司徒從事中郎

張敷好讀元言與高士南陽宗少文談繫象少文每屈
塵尾歎曰吾道東矣於是名價日重後爲司徒左長史
江夷字茂遠少自操勵爲後進之美位至吏部尚書吳
郡太守蔡廓爲祠部尚書年位並輕而爲時流所推重
每至歲時皆束帶到門

王宏字休光少好學以清怡知名與尚書僕射謝鯤善
位至太保

顏延之與陳郡謝靈運俱以辭彩齊名自潘岳陸機之

後文士莫及也江左稱顏謝焉所著並傳於世延之位至金紫光祿大夫

孔本少骨骸有風力以是非爲已任口吃讀書早知名初舉揚州秀才補主簿後至輔國將軍行會稽郡事

王敬宏所居舍亭山林環周備登臨之美時人謂之王東山

褚炫爲中書侍郎司徒右長史順帝時炫以清尚與劉侯謝朓江徵八殿侍文義號爲四友



册府元龜卷七百七十六

欽定四庫全書

冊府元龜卷七百七十七

宋 王欽若等撰

總錄部

名望第二

南齊張率為太子舍人武帝請曰卿東南物望朕宿昔
所聞秘書丞天下清官今以相處為卿定名譽尋以為
秘書丞

王績字叔素借武帝為撫軍吏部尚書張岱選績為長

史呈選牒帝笑曰此可謂素望

何佟之廬江瀟人明帝建武中為鎮北記室叅軍侍皇太子講時步兵校尉劉瓛徵士吳苞皆已卒京邑碩儒惟佟之而已

何戢為吏部尚書美容儀動止與褚淵相慕時人呼為小褚公

陸慧曉為司徒右長史時陳郡謝朓為左長史府公竟陵王子良謂王融曰我府二上佐求之前世誰可為比

融曰兩賢同時便是未有前例

陸子真吳郡人王僧達貴公子以才傲物為吳郡太守入閩門曰彼有人焉顧琛一公兩掾英英門戶陸子真五世內侍我之流亞

張融父暢有名於世後融為南陽王友接對北使李道固就席道固顧而言曰張融是宋彭城長史張暢子不融頰蹙久之曰先君不幸名達六夷

張寶積融弟也建武中出為廬陵太守時名流謝淪何

點陸惠曉孔稚珪至融弟鐵之舍點造坐便曰今日可謂盛集二五我兄弟之流阿六張氏保家之子顧見王思遠曰卿詐作善非實得也五謂孔稚珪及融並第五朱巽以義烈知名官至江夏王叅軍吳平令

孔廣字淹源會稽人同郡孔逵皆才學知名廣美容止善談吐主儉張緒咸美之儉嘗云廣來使人廢簿領逵不須來來則莫聽去緒數巾車詣之每歎云孔廣使吾成輕簿祭酒仕至揚州治中從事逵抗直有才藻製東都

賦于時才士稱之陳郡謝朓年少時游會稽還父莊問
入東何見見孔道不其見重如此

王筠字元禮又字德柔琅邪臨沂人少擅才名與劉孝
綽見重當世位至太子詹事

傅昭字茂遠北城靈州人祖和之父淡知名宋世或有
稱昭於廷尉虞愿乃遣車延昭時愿宗人通之在坐並
當世名流官至散騎常侍

張纘字伯緒為太子洗馬歷中舍並掌管記與琅邪王

錫齊名普通初魏遣彭城人劉善明詣京師請和求識
續時年二十三善明見而嗟服後至平北將軍

顏協為相東王國常侍世祖出鎮荊州轉記室時吳郡
顧協亦在藩邸與協同名才學相亞府中稱為二協

何思澄與宗人遜子郎俱擅文名時人語曰東海三何
子郎最多思澄聞之曰此言誤耳如其不然故當歸遜
思澄意宜在已也位至宣惠武陵王中錄事

伏暉字玄耀曼容之子幼傳父業能言玄理與樂安任

昉彭城劉曼俱知名官至給事黃門侍郎

柳裘字茂和義興太守明之子少聰慧弱冠有令名歷
尚書郎駙馬都尉

梁蔡大業為太常卿有五子允恭最知名起家著作
佐郎

柳愷為黃門侍郎與瑯邪王峻齊名俱為中庶子時人
號為方正

王操為尚書令有七子次子衡最知名有才學起家祕

書郎

陳沈照字孔明吳興武康人少有俊才為當時所重後至明威將軍

宗元饒南郡人少好學以孝敬聞位至吏部尚書

顧野王父烜為臨賀王記室以儒術知名野王少以篤學至性知名為太子率更令時官僚有濟陽江德吳國陸瓊北地傅繹吳興姚察並以才學顯著論者推重焉周弘正字思行汝南人仕梁為左民尚書散騎常侍元

帝著金樓子曰余以諸僧重招提琰法師隱士重華陽
陶貞白士大夫重汝南周弘正其於義理清轉無窮亦
一時之名士也位至尚書右僕射

徐陵字孝穆名高一代位至尚書僕射

王冲字長深善與人交貴游之中聲名藉甚位至左光
祿大夫領丹陽尹

王通瑯邪人父琳有子九人並知名通位至左光祿大
夫加特進侍中

張種吳郡人少悟靜居處雅正不妄交游時人為之語

曰宋稱敷演梁則卷充清處學尚種有其風

敷演卷充四人皆張

氏有名者也種至光祿大夫

蕭引為吏部郎卒子德言最知名引宗族子弟多以行
知名

陸繕幼有志尚以雅正知名位至左僕射

顏晃琅邪人家世單門傍無戚援而介然修立為當世
所知官至散騎常侍兼中書舍人

後魏崔玄伯清河東武城人與同郡董謚文京崔康時
廣陽霍原等俱以碩學播名遼海位至天部大夫進祿
為公

高翻太尉謚之子以器度知名卒於侍御中散

崔棖三齊人以才學知名舉冀州秀才

公孫軌字元慶少以文學知名後為中書郎

屈遵字子度昌黎徒河人博學多才藝名著當時位至
侍中

李順字德正博涉經史有才策知名於世官至散騎常侍

李騫字希義博涉經史文藻富盛年十四為國子學生以聰達見知

李暉字善祖小字藥囊少有高名為中書侍郎李承燉煌公寶之子方裕有鑒裁為時所重

薛聽字延智有世譽累遷治書侍御史直閣將軍

房宣明靈建之子以文學著稱雅有父風為中書博士

房堅字千秋少有才名為祕書郎

房靈賓文藻不如兄靈建而辯悟過之靈建在南官至
州治中渤海太守以才名見稱兄弟俱入國時三齊平
隨例徙為平齊人

高韜少以英朗知名同郡封懿雅相敬為慕容垂太尉
從事中郎

盧文甫字元祐少有器尚涉歷文史有譽於時
崔綽博陵安平人少孤學行修謹有名於世

呂羅漢仁篤慎容弱冠以武幹知名官至內都大官

張蒲甚為明元所委在謀臣之列屢出為將朝廷清論嘗為稱首後為湘州刺史

趙柔字元順金城人少以德行才學知名河右官至河內太守

張湛字子然一字仲玄燉煌人弱冠知名涼士好學能屬文冲素有大志為沮渠蒙遜黃門侍郎

李孝伯美名聞於遐邇孝彪使於齊武帝謂之曰在北

有李孝伯位至尚書

游雅字伯度小名黃頭廣平任人少好學有高才太武時與渤海高允等俱知名徵拜中書博士東宮內侍長游明根孝文初與高閭以儒老學業特被禮遇公私出入每相追隨而閭以才華時侮明根世號高游焉明根位至大鴻臚卿閭後至中書監

李神俊小名提少以才學知名為太常劉芳所賞位至侍中

宋弁字義和廣平列人人也祖愔與從叔宣博陵崔建俱知名太武時歷位中書博士員外散騎常侍

張烈字徽仙少孤貧涉獵經史有氣槩時青州有崔徽伯房徽叙與烈並有令譽時人號曰三徽後至瀛州刺史

陽尼博通經籍與上谷侯天護頓邱李彪同志齊名官至幽州北平府長史

祖瑩與陳郡袁翻齊名秀出時人為之語曰京師楚楚

袁與祖維中翩翩祖與袁瑩位至車騎大將軍翻至撫
軍將軍

北齊邢邵字子才十歲能屬文文章典麗既贍且速年
未二十名動衣冠與濟陰溫子昇為文士之冠世論謂
之溫邢鉅鹿魏收雖天才豔發而年事在二人後故子
昇死後方稱邢魏馬邵位至中書監

魏收字伯起小字佛助與河間邢子才及收叔季景並
以文章顯世稱大邢小魏言尤俊也溫子昇邢子才世

號三才收少子才十歲子才每曰佛助寮人之偉後收
稍與子才爭名文宣貶子才曰爾才不及魏收收益得
色自序云先稱溫邢後曰邢魏然收內陋邢心不許也
位至尚書右僕射

崔陵狀貌偉麗善於容止少有名望為當世所知趙郡
李渾嘗譙聚名輩詩酒正謹謙陵後到一坐無復談話
者鄭伯猷歎曰身長八尺面如刻畫聲欬為洪鍾響曾
中貯千卷書使人那得不畏服位至東兗州刺史

鄭述祖字恭文滎陽開封人少聰敏好屬文有風簡為
先達所稱譽釋褐司空行參軍

陸印字雲駒少機悟美風神好學不倦博覽羣書五經
多通大義善屬文甚為河間邢邵所賞邵又與印父子
彰交游嘗謂子彰曰吾以卿老蚌遂出明珠意欲為群
拜紀可乎由是名譽日高儒雅縉紳尤所推許為吏部
郎中

李廣博涉群書有才思文義之美少與趙郡李審齊名

為邢魏之亞而訥於言敏於行官至侍御史

皮子信大將軍景和之子機悟有風神微涉書傳後主時為衛將軍於勲貴子弟之中稱其鑒識

盧公順早以文學見知為符璽郎待詔文林館與博陵崔君洽隴西李師上同志友善從駕晉陽寓居僧寺朝士謂唐寺三少為物論推許

陽林之後爽有風槩少勤學愛文藻弱冠擅聲為後來之俊秀位至中書監

祖珽字孝徵神情機警詞藻適逸少馳令譽為世所推
起家祕書郎

後周席固襄陽人居家孝友為州里所重官至昌州刺
史

韋孝寬為浙陽郡守時獨孤信為新野郡守同隸荊州
與孝寬情好款密政術俱美荆部吏人號為連璧

韋壽字世齡鄭國公孝寬之子以貴公子早有令譽為
右侍上士

柳莊字思敬少有器量博覽墳籍兼善辭令濟陽蔡大寶有重名於江右時為岳陽王蕭啓諮議見莊歎曰襄陽水鏡復在於茲大寶遂以其女妻之俄而啓辟為參軍

蘇亮好屬文善章奏與弟湛等皆著名西土年二十餘舉秀才至雒陽過河內常景景深器之退而謂人曰秦中才學可以抗山東者將此人乎位至侍中

宇文神舉偉風儀善辭令博涉經史性愛篇章尤工騎

射臨戎對寇勇而有謀莅職當官每著聲績兼好施愛
士以雄豪自居故得任兼文武聲彰外內百僚無不仰
其風采先輩舊齒于今稱之位至并州總管

隋李德林字公輔初仕周為內史上士武帝嘗於雲陽
宮作鮮卑語謂羣臣云我嘗日惟聞李德林名及見其
與齊朝作檄移我正謂其是天上人豈意今日得其驅
使復為我作文書極為大異德林既少有才名重以貴
顯凡製文章動行於世或不知者謂為古人焉位至上

儀同贈定州刺史

柳裘字茂和少聰慧弱冠有令名官至曹州刺史

何妥字棲鳳少聰警年十七以技巧仕梁湘東王後知其聰明名為誦書左右時蘭陵蕭春亦有俊才住青楊巷妥住白楊巷時人為之語曰世有兩俊白楊何妥青楊蕭春其見美如此官至國子祭酒

劉焯以儒學知名劉炫聰明博學名亞於焯故時人稱為二劉焉焯官至太學博士炫至旅騎尉

元暉尚書左僕射翬之子頗好涉獵書記少得美名於
京下

王眷字元恭琅邪臨沂人博學多通少有盛名於江左
歷太子洗馬中舍人

裴政字南金位膳部郎中學涉有文藻以輕財貴義稱
陸彥師字雲房少有行檢為邦族所稱位至吏部侍郎
宇文愷字安樂愷少有器局家世武將諸兄並以弓馬
自達愷獨好學博覽書記解屬文多伎藝號為名公子

位至金紫光祿大夫

崔儵字岐叔北齊待詔文林館歷殿中膳部員外三曹郎中儵與頓邱李若俱見稱重時人為之語曰京師灼灼崔儵李若

王胄字承基為著作佐郎與虞綽齊名同志友善于時後進之士咸以二人為準的胄官至朝散大夫綽至著作佐郎

蘇夔尚書右僕射威之子少有盛名於天下引致賓客

四海士大夫多歸之官至通議大夫

于仲文倜儻有大志氣調英拔當時號為名公子起家
為趙王屬

游元仕後周歷壽春令譙州司馬俱有能名

敬肅字宏儉少以貞介知名仕至潁川郡丞

陳孝意少有志尚弱冠以貞介知名仕至鴈門郡丞

唐李百藥德林子也以名臣之子才行相繼四海名流

莫不宗仰位至宗正卿

杜淹聰辯多才藝弱冠有美名於京邑位至御史大夫薛收與從子元敬及薛德音俱有才名時人謂之河東三鳳呼收為長雛德音為鶯鶯元敬最小謂鶯雛收仕至天策府記室元敬至天策府叅軍兼直記室

郎余令少以博學知名為霍王元軌府叅軍元軌深禮之先是余令從父知年為霍王友元軌謂人曰郎氏兩賢人之望也

王績字無功絳州人嘗躬耕於東臯故時人號東臯子

白履忠陳留浚儀人博涉文史隱居于古大梁城時人
號梁丘子

孔紹安少與兄紹新俱以文詞知名外兄虞世南歎異
之時有詞人孫萬壽與紹安篤忘年之好時人稱為孫
孔紹安官至祕書監

鄭世翼鄭州滎陽人弱冠有盛名後為揚州錄事參軍
謝偃善為賦李百藥工為五言詩時人稱為李詩謝賦
仕至魏王府功曹

許叔牙為太子洗馬兼崇賢館學士又有臨淮劉子翼
彭城劉裔之與叔牙相次為學士並以文學知名

楊炯華州華陰人少與絳州王勃范陽盧照隣東陽駱
賓王皆以文詞知名海內稱為王楊盧駱亦號為四傑
炯至盈川令勃至虢州叅軍照隣至新都尉賓王至臨
海丞

張昌齡冀州人弱冠以文詞知名仕至襄州司戶北門
修撰

趙元楷性機辯明於簿領隋末任上郡東曹掾以幹理見稱煬帝聞其名遷署厯陽郡丞

孟利貞與董思恭元思敬同時並以文藻知名利貞仕至著作郎弘文館學士思恭至太史思敬至協律郎

劉禕之少與孟利貞高知周郭正一俱以文藻知名時人目為劉孟高郭禕之官至中書侍郎同中書門下三品知周至右散騎常侍正一至陝州刺史

林輔元汴州浚儀人與伯父德仁同郡剡縣丞繁師玄

齊王文學王孝逸羅川戶曹靖君亮司隸從事鄭祖咸
軍城縣長鄭師善王充中書舍人李行簡處士協咸見
重於隋代號為陳留八俊

邢文偉滁州人與和州高子貢俱以博學知名於江淮
間仕至內侍史出為珍州刺史

蓋文達博涉經史其宗人文懿亦以儒業知名當時稱
為二蓋焉文達位至蜀王師文懿至國子博士

杜易簡博學有高名姨兄岑文本甚推重之仕至開州

司馬

周思茂貝州漳南人少與弟思均俱早知名仕至麟臺
少監文館學士

喬知之同州馮翊人少與弟侃備並以文詞知名知之
尤稱俊才官至左司郎中侃至襄陽令

富嘉謨雍州武功人與新安吳少微屬文皆以經典為
本時人欽慕之稱為吳富體初嘉謨為晉陽尉與少微
同官魏郡谷倚為太原主簿皆以文詞著名時人謂之

北京三傑嘉謨少微並官至監察御史倚後流寓客死
韓滉宰相休之子幼有美名所與結交皆時之俊彥非
公忠正直者不與之親密位至右僕射

沈佺期善屬文尤長五言之作與宋之問齊名時人稱
為沈宋佺期官至太子詹事

宋之問父令文有勇力而工書善屬文世人以為三絕
之問以文詞知名弟之悌有勇力之遜善書議者云各
得父之一絕之問後至越州長史之遜至太原尹

徐彥伯兗州瑕邱人少以文章擅名為蒲州司兵參軍
時司戶韋暹善判事司士李亘工於翰札而彥伯以文
詞雅美時人謂之河中三絕

陸象先初為雒陽尉以宰相子聞望甚高

蘇晉與雒陽人張循之仲之兄弟為友並以學業著名
劉允濟善屬文與絳州王勃早齊名特相友善官至鳳閣
舍人左遷青州長史

蘇味道少與李嶠俱以文學知名時人謂之蘇李味道

位至鳳閣侍郎同鳳閣鸞臺三品嶠至中書令

蘇瓌中宗朝歷左右僕射同中書門下三品子七人頤
冰詵又頴銳顏頤最知名官至中書侍郎平章事詵戶
部員外瓌與李嶠同居相位嶠有才華其子不肖瓌以
幹理而頴有文詞故代稱蘇瓌有子李嶠無兒

薛登博涉文史少與徐堅劉子玄齊名友善登官至太
子賓客堅至右散騎常侍子玄至左散騎常侍貶安州
別駕

趙驥與殷寅顏真卿柳芳陸據蕭頴士李華邵軫同志
友善故天寶中語曰殷顏柳陸蕭李邵趙以其重行義
敦交道也驥至祕書少監

蔣沅性耿介獨好學早有名稱官至左散騎常侍

蕭嵩長子華兵部侍郎少子衡尚新昌公主拜駙馬都
尉並風流簡肅士族稱之

韋陟中書令安石之子開元初丁父憂居喪過禮自此
杜門不出八年于茲與弟斌相勸勵探討墳索不捨晝

夜文華當代俱有盛名官至吏部尚書東都留守

李邕為滑州刺史上計京師邕素負美名頗被貶斥皆以邕能文養士賈生信陵之流執事忌勝剝落在外人間素有聲稱後生不識京雒阡陌聚觀以為古人或將眉目有異衣冠望風尋訪閭巷又中使臨問索其新文復為人陰中竟不進

賀知章會稽人少以文詞知名神龍中知章與越州賀朝萬齊融揚州張若虛邢巨湖州包融俱以吳越之士

文詞俊秀揚名於上京位至銀青光祿大夫正授兼祕
書監

蕭穎士字茂挺與李華同年登進士第開元中天下承平
人物駢集如賈曾席豫張洎韋述輩皆有盛名而穎士皆
與之游繇是搢紳多譽之是時外夷亦知穎士之名新
羅使入朝言國人願得蕭夫子為人師其名動華夷若
此

王維以詩名盛於開元天寶間凡諸王駙馬豪右貴勢

之家無不拂席迎之代宗時弟縉為宰相嘗謂縉曰卿之伯氏天寶中詩名冠代位至尚書右丞

李白少與魯中諸生孔巢父韓準裴政張叔明陶沔等隱於徂徠山時號竹溪六逸白後待詔翰林辟永王璘從事

杜甫字子美天寶末詩人甫與李白齊名後至檢校工部員外郎

路羣志行貞潔不茹葷食肉養親以孝聞自長慶以來

高名重價歷踐清華及卒時論嗟惜

楊綰素以德行著稱清識過人凡所知友皆一時名士
位至中書侍郎平章事

李栖筠字貞一趙郡贊皇人幼孤貧而器度雄遠體貌
瓌傑博覽墳籍無所不通屬文勁迅然本於理道教化
性嚴重寡言造次不妄交接故當時高名之士皆敬慕
之為御史大夫以剛正為元載所惡天下之士重其高
義雖三尺童子皆知敬慕稱為贊皇公而不名焉

張涉以經學為儒官嘗舉日試萬言當時呼為張萬言
官至散騎常侍

李承少有雅望至其從官頗以貞廉才術見稱於時累
官襄州潭州刺史

崔造與韓會盧東美張正則為友皆僑居上元好談論
經濟之略嘗以王佐自許時人號為四夔造後至給事
中平章事

韋夏卿早有時稱其所與游皆一時名士位至東都留

守選太子少保

趙昌字洪祚祖不器父居貞皆有名於時昌官至太子少保

鄒士美善與人交然諾之際豁如也當時名稱甚茂位至忠武軍節度使

呂元膺學識深遠處事得體正色立朝有台輔之望位至太子賓客

薛戎為浙東觀察使兄弟五人季弟放最知名放至江

西觀察使

韓臯字仲文夙負令名而器質重厚有大臣之度後為杭州刺史再為尚書右丞遷武昌鎮海忠武三節度所至皆有聲績大率用簡儉為理及位高益為時人所重錢起與韓翊李端盧綸司空曙輩十人俱以能詩出入貴游之門時號十才子形於圖畫位終尚書郎

錢徽起之子也以文學操行立名於時官至吏部尚書郎致仕

孔敏行字至之文宣王四代孫父述眷有高名於貞元間敏行名臣子少時修潔為人所稱慕及游宦與當時豪俊為友其名華為一時歸湊

崔郾與兄邠等皆有令譽而郾疎財恢廓弟兄所不及郾位至浙西觀察使邠至太常卿

元稹字微之聰警絕人年少有才名與太原白居易友善工為詩善狀詠風態物色當時言詩者稱元白馬稹至工部侍郎平章事卒於武昌軍節度使居易至刑部尚

書致仕

李商隱字義山與太原溫庭筠南郡段成式齊名時號三才子商隱後至東川節度判官檢校工部郎中庭筠至隋縣尉成式至江州刺史

王凝咸通中知禮闈時凝擅價一時與路岳相齊語曰王凝路岳見便脫殼位至宣州觀察使

後唐宰相趙光裔唐天祐中歷官省閣伯仲皆以廉潔方正流聞于時自梁孽未亡時趙氏伯仲之名北人皆

所傾慕位至平章事

賈馥性恬澹與物無競為鎮州士人之秀位至鴻臚卿
致仕

趙光逢幼嗜墳典動守規檢議者目之為玉界尺昭宗
朝登進士第踰月辟度支巡官臺省內外俱制俱有能
名後為太保致仕

晉鄭韜光唐宣宗之外孫萬壽公主之所出也生三日
賜一子出身銀章朱綬及長美容止神爽氣徹不妄喜

怒而秉執名節為甲族所稱後為戶部尚書致仕

冊府元龜卷七百七十七

欽定四庫全書

冊府元龜卷七百七十八 宋 王欽若等 撰

總錄部

高尚

易曰高尚其事仲尼之稱儒有不臣不仕者焉斯蓋抱
樸以自守處晦而無悶不降其志獨善其身絕俗以高
蹈確乎其不可拔也三代以還乃有恥廁家陪之列不
覲驕君之餌棄卿相之位辭封爵之富安車徵聘而靡

屈公府交辟而不起雖復蒲帛賁于邱園羔鴈陳於庭
戶視之蔑如也非夫德充於內道茂乎已厲行無爽處
躬有裕又安能不墮穫而充詘哉然而當時之君亦曷
嘗不優容全度以成其高世之節今並採其事迹著之
于篇或有雖在早歲抗志而避名暨及晚年逢辰而貴
仕出處有道亦無媿焉

閔損字子騫魯人孔子弟子也不仕大夫不食污君之
祿季氏使子騫為費宰子騫曰善為我辭焉

不欲為季氏宰語使

者善為我作辭
說今不復召我
如有復我者
復我者重
必在汶上矣
去

汶水之上
欲北如齊

莊周蒙人也楚王
史記作威王
遣使者持金千斤白璧百雙

聘欲以為相莊子固辭而不許使者曰黃金白璧寶之至重卿相之位至尊先生辭而不受何也莊子曰子所謂見其一未知其二者也獨不見入廟之犧乎衣以文繡飼以芟穀出則清道而行止則居帳之內此寧不貴邪及其不免於死庖宰執刀於前或持刃在後當是之

時雖欲與狐豚伍雞鼠游豈得乎哉僕聞之左手據天下之圖右手刎其喉愚者不為也何則身重於天下也又况卿相之位乎終辭而不受

魯仲連齊人也好奇偉倣儻之畫策而不肯仕官任職好持高節游於趙會秦圍趙魏王使客將軍新垣衍間入邯鄲因平原君欲令趙尊秦為帝魯連責而歸之秦軍引去於是平原君欲封魯連魯連辭讓使者三往終不肯受平原君乃置酒酒酣起前以千金為魯連壽魯

連笑曰所謂貴於天下之士者為人排患釋難解紛亂而無取也即有取者是商賈之事也而連不忍為也遂辭平原君而去終身不復見其後復為齊將田單遺燕將書下聊城田單欲爵之魯連逃隱於海上曰吾與富貴而詘於人寧貧賤而輕世肆志焉

淳于髡齊人客有見髡於梁惠王惠王再見之而終無言也知王之志在驅逐音聲也後復見一語連三日三夜無倦惠王欲以卿相位待之髡因謝去於是以安車駕駟東

帛加璧黃金百鎰終身不仕

顏蠲齊人宣王謂蠲請受教為弟子且先生與寡人游食必
太牢出必乘車妻子衣服麗都顏蠲辭去曰夫玉生於山制
則破焉非弗寶貴矣然太璞不完士生乎鄙野推選則祿焉
非不得尊遂也然而形神不全蠲願得蔬食以當肉安步
以當車無罪以當貴清靜貞正以自虞制言者王也盡忠直
言者蠲也言要道已備矣願得賜歸安行而反臣之邑屋則
再拜而辭去君子曰蠲知足矣歸真反璞則終身不辱也

漢鄭子真耕於谷口非其服弗服非其食弗食大將軍
王鳳以禮聘子真子真遂不屈

後漢王扶客居瑯邪國相張宗謁請不應欲強致之遂
杖策歸鄉里連請固病不起太傅鄧禹辟不至

廉范喪親服竟詣京師受業事博士薛漢京兆隴西二
郡更請名皆不應後舉茂才累遷至蜀太守

承官少勤學不倦經典既明乃歸家教授三府更辟皆

不應

三府謂太尉
司徒司空府

鄭均常稱病家庭不應州郡辟召郡將欲必至之使縣令請將詣門既至卒不能屈均於是客於濮陽建初三年司徒鮑昱辟之後舉直言並不詣

趙典性明達至節清亮益州舉茂才以病辭太尉黃瓊胡廣舉有道方正皆不應

桓煜舉孝廉有道方正茂才三公並辟皆不應

張衡雖才高於世而無驕尚之情嘗從容淡靜不好交接俗人永元中舉孝廉不行連辟公府不就安帝雅聞

衡善術學公車特徵拜郎中累遷至尚書

周燮字彥祖汝南安城人專精禮易不讀非聖之書不修賀問之好有先人草廬結于岡畔下有陂田嘗肆勤以自給非身所耕漁則不食也鄉黨宗族希得見者舉孝廉賢良方正特徵皆以疾辭延光二年安帝以玄纁羔幣聘燮及南陽馮良二郡各遣丞掾致禮宗族更勸之曰夫修德立行所以為國自先世以來勲寵相承君獨何為守東崗之陂乎燮曰吾既不能隱處巢穴追綺

季之跡而猶顯然不遠父母之國斯固以滑泥揚波同
其流矣夫修道者度其時而動動而不時焉得享乎因
自載到潁川陽城遣生送敬送敬猶致謝也遂辭疾而歸良亦
載病到近縣送禮而還詔書告二郡歲以羊酒養病至
七十餘而卒

孫期習京氏易古文尚書牧豕於大澤中以養親郡舉
方正遣吏齋羊酒請期期驅豕入草不顧司徒黃琬特
辟不行終於家

李固司隸益州並命郡舉孝廉辟司空掾皆不就

謝承書曰

五察孝廉益州再舉茂才不應五府連辟皆辭以疾後公卿舉固對策以為議郎

累加至太尉

張芝少持高節以名臣子勤學文為儒宗武為將表太尉辟公車有道徵皆不至號張有道

周總汝南汝陽人父舉光祿大夫以父任為郎自免歸家父故吏河南名夔為郡將卑身降禮致敬於總恥交報之因杜門自絕後太守舉孝廉復以疾去時梁冀貴

盛被其徵命者莫敢不應惟懿前後三辟皆不能屈後
舉賢良方正不應又玄纁備禮固辭廢疾嘗隱處竄身慕
老聃清靜杜絕人事巷生荆棘十有餘歲至延熹二年
乃開門延賓游談宴樂及秋而梁冀誅年終而懿卒時
年五十蔡邕以為知命

姜肱諸公爭加辟命皆不就二弟名聲相次亦不受徵
聘時人慕之桓帝乃下彭城使畫工圖其形狀肱以被
韜面終不得見年七十七卒

徐穉屢辟公府不起時陳蕃為太守以禮請署功曹穉不免之既謁而退建武中卒於家

趙晔受韓詩州名補從事不就舉有道卒於家

張康山陽人習韓詩舉有道博士徵不就卒於家

宗慈南陽人舉孝廉九辟公府有道徵皆不就後為修武令棄官去徵拜議郎未到道疾而卒

侯瑾州郡累召公車有道徵並稱疾不到

李南少篤學明風角後舉有道辟公府並不行終於家

孔喬幽居修志銳意典籍至歷年身不出門鄉里莫得
瞻見公車徵不行卒於家

桓鸞以世濁州郡多非其人恥不肯仕

黃憲汝南人太守王龔在郡進禮賢達多所降致卒不

能屈憲初舉孝廉又辟公府有人勸其仕憲亦不拒之

暫到京師而還意無所就年四十八終天下號曰徵君

法真字高卿高一作喬性恬靜寡欲不交人間事太守請見

之真乃幅巾詣謁太守曰昔魯哀公雖為不肖而仲尼

稱臣太守虛薄欲以功曹相屈光贊本朝如何真曰以
明府見待有禮故敢自同賓末若欲吏之真將在北山
之北南山之南矣太守懼然不敢復言辟公府舉賢良
皆不就同郡田羽薦真曰處士法真體兼四業學窮典
奧幽居恬泊樂以忘憂將蹈老成之高蹤不為玄纁屈
也臣願聖朝就加袞職必能唱清廟之歌致來儀之鳳
矣會順帝西巡羽又薦之帝虚心欲致前後四徵真曰
吾既不能遊形遠世豈飲洗耳之水哉遂深自隱絕終

不降屈友人郭正稱之曰法真名可得而聞身不可得而見逃名而名我隨避名而名我追可謂百世之師者矣乃共刻石頌之號曰玄德先生年八十九以壽終

董扶有重名永康元年日有蝕之詔舉賢良方正之士策問得失左馮翊趙廉等舉扶扶以病不詣遙於長安上封事遂稱疾篤歸家前後宰府十辟公車三徵再舉賢良方正博士有道皆不就名稱尤重

許邛有高行辟公府掾拜鄆陵令方正徵皆不就避亂

江南所歷之國必翔而後集終於豫章宗人許相沈沒
榮利致位司徒舉宗莫不匍匐相門承風而驅官以賄
成惟卻不過其門

申屠蟠再舉有道不就前後徵辟文書悉挂於樹初不
顧眄也大將軍何進連徵不詣進必欲致之使蟠同郡
黃忠書勸曰前幕府初開至如先生特加殊禮優而不
名申以手筆設几杖之坐經過二載而先生抗志彌高
所尚益固竊論先生高節有餘於時則未也今賴川荀

爽載病在道北海鄭玄北面受署彼豈樂羈牽哉知時
不可逸豫也昔人之隱遭時則放聲滅跡巢棲茹薇其
不遇也則裸身大笑披髮狂歌今先生處平壤游人間
吟典籍襲衣裳事異昔人而欲遠蹈其跡不亦難乎孔
子可師何必首陽蟠不答太尉黃瓊辟不就及瓊卒歸
塋江夏四方名豪會帳下者六七千人互相談論莫有
及蟠者惟南郡一生與相酬對既引執蟠手曰君非聘
則徵如是相見於上京矣蟠勃然作色曰始吾以子為

可與言也何意乃相拘教樂貴之徒邪因振手而去不復與言年七十四終於家

劉淑明隱居講授州郡禮請五府連辟並不就永興二年司徒种暠舉淑明賢良方正辭以疾桓帝聞其名勅責州郡使輿病詣京師淑明不得已而赴雒陽對策為天下第一累遷至侍中虎賁中郎將

陳寔嘗為太丘長以沛相賦歛違法乃解印綬去及黨禁始解大將軍何進司徒袁隗遣人喻寔欲特表以不

次之位寔乃謝使者曰寔久絕人事飾巾待終而已時三公每缺議者歸之累見徵命遂不起閉門懸車棲遲養老實子紀遭黨錮著書數萬言黨禁解四府並命無屈就

种岱字公祖好學養志舉孝廉茂才辟公府不就辟車特徵病卒

楊彪字文先少傳家學初舉孝廉州舉茂才辟公府皆不應

郭林宗游於雒陽名震京師司徒黃瓊辟太常趙典舉
有道或勸林宗仕進者對曰吾夜觀乾象晝察人事天
之所廢不可支也遂並不應卒於家

田盛與郭林宗同好亦名知人優游不仕並以壽終

孟敏游學十年遂知名三公俱辟並不屈

潁容通春秋左氏郡舉孝廉州辟公府徵皆不就初平
中避亂荊州劉表以為武陵太守不肯起卒於家

皇甫嵩朝郡人也太尉陳蕃大將軍竇武連辟並不到

靈帝公車徵為議郎後拜太尉其冬以流星策免復拜
光祿大夫遷太常卒

鍾皓九辟三府徵廷尉正博士林慮長皆不就年六十
九卒

張玄字處虛沉深有才略以時亂不仕司空張溫數以
禮辟不能致及董卓秉政辟以為掾舉侍御史不就卓
臨之以兵不得已彊起病終

鄭玄表紹舉茂才為左中郎將皆不就公車徵為大司

農給安車一乘所過長史送迎玄乃以病自乞還家年七十四而卒

李燮父固誅後亡匿遇赦乃還鄉里追服州郡禮命四府並辟皆無所就後徵拜議郎擢遷河南尹

賀純字仲真會稽山陰人少為諸生博極羣藝十辟公府三舉賢良方正五徵博士四公車徵皆不就

袁弘恥其門族貴勢乃燮姓名徒步師門不應徵辟終於家初弘嘗入太學其從父逢為太尉呼弘與相見遇

逢宴會作樂弘伏稱頭痛不聽聲音而退遂不往紹術兄弟亦不與通

仲長統每州郡命名輒稱疾不就嘗以為凡遊帝王者欲以立身揚名耳而名不常存人生易滅優遊偃仰可以自娛欲卜居清曠以樂其志論之曰使居有良田廣宅背山臨流溝池環匝竹木周布塲圃築前果園樹後舟車足以代步涉之艱使令足以息四體之役養親有兼珍之膳妻孥無苦身之勞良朋萃止則陳酒肴以娛

之嘉時吉日則烹羔豚以奉之踏蹕畦苑遊戲平林濯
清水追涼風釣游鯉弋高鴻風於舞雩之下詠歸高堂
之上安神閨房思老氏之玄虛呼吸精和求至人之仿
彿與達者數子論道講書俯仰二儀錯綜人物彈南風
之雅操發清商之妙曲逍遙一世之上睥睨天地之間
不受當時之責永保性命之期如是則可以凌霄漢出
宇宙之外矣豈羨夫入帝王之門哉又作詩二篇以見
其志尚書令荀彧舉為尚書郎後參丞相曹操軍事

孔融與平原陶邱洪陳留邊讓齊聲稱州郡禮命皆不
就後獻帝徵為將作大匠遷少府復拜大中大夫

廖扶汝南平輿人嘗歎曰老子有言名與身孰親吾豈
為名乎遂絕志世外專精經典尤明天文識緯風角推
步不應辟召時人號為北郭先生

趙壹郡舉上計名動京師及還州郡爭致禮命十辟公
府並不就終於家

王烈字彥方太原人察孝廉三府辟皆不就避地遼東

太守公孫度欲以為長史烈乃為商賈自穢得免曹操
聞烈高名遣徵不至建安二十四年終於遼東

繆斐字文雅該覽經傳事親色養徵博士六辟公府獻
帝在長安公卿博舉名儒時舉斐任侍中並無所就

張儉為山陽東部督郵坐黨事亡命中平元年黨事解
乃還鄉里大將軍三公並辟又舉敦朴公車特徵起家
拜少府皆不就

王雋為人外靜而內明不應州郡獻帝之都許復徵為

尚書又不就

張奉字公先弟表字公儀河內人兄弟少有高節諸公連徵不就謂之張氏兩賢

襄楷平原隰陰人

在齊州臨邑縣西

好學博古延熹中宦官專

朝政刑暴濫又比失皇子災異尤數楷自家詣闕上書其詞切直坐論司寇及靈帝即位以楷書為然太僕陳蕃舉方正不就鄉里宗之每太守至輒致禮請中平中與荀爽鄭玄俱以博士徵不至卒於家

魏邴原字根矩少與管寧俱以操尚稱州府辟命皆不就孔融為北海相舉原有道後徙署丞相徵事代涼茂為五官將長史

管寧字幼安漢末避亂遼東黃初中來歸司徒華歆舉

寧詔以寧為太中大夫固辭

傅子曰寧上書天子且以病辭曰臣聞傳說發夢以

感殷宗呂尚啟兆以動周文以通神之才悟於聖主用能輔佐帝業克成大勲臣之器朽實非其人雖貪清時釋體蟬蛻內省頑病日薄西山惟陛下聽野人山藪之願使一老者得盡微命書奏帝親覽焉明帝即

位太尉華歆遜位讓寧遂下詔曰太中大夫管寧耽懷

道德服膺六藝清虛足以侔古廉白可以當世曩遭王道衰缺浮海遁居大魏受命則襁負而至斯蓋應龍潛升之道聖賢用舍之義而黃初以來徵命屢下每輒辭病拒違不至豈朝廷之政與生殊趣將安樂山林往而不能反乎夫以姬公之聖而考德不降則鳴鳥弗聞以秦穆之賢猶思詢乎黃髮况朕寡德曷能不願聞道於子大夫哉今以寧為光祿勳禮有大倫君臣之道不可廢也望必速至稱朕意焉又詔青州刺史曰寧抱道懷

真潛翳海隅比下徵書違命不至盤桓利居高尚其事
雖有素履幽人之貞而失考父茲恭之義使朕虚心引
領歷年其何謂邪徒欲懷安必肆其志不惟古人亦有
翻然改節以隆斯民乎日逝月除時方已過澡身浴德
將以曷為仲尼有言吾非斯人之徒與而誰與哉其命
別駕從事郡丞掾奉詔以禮發遣寧詣行在所給安車
吏從茵褥道上厨食上道先奏寧稱草莽臣上疏曰臣
海濱孤微罷農無伍祿運幸厚橫蒙陛下纂承洪緒德

侔三皇化溢有唐久荷渥澤積祀一紀不能仰荅陛下
恩養之福沈委篤痾寢疾彌留逋違臣隸顛倒之節夙
宵戰怖無地自厝臣元年十二月被公車司馬令所下
州郡八月甲申詔書徵臣更賜安車衣被茵褥以禮發
遣光寵並臻優命屢至忤營悚息悼心失圖思自陳聞
申展愚情而明詔抑割不令稍修章表是以鬱滯訖於
今日誠謂乾覆恩有紀極不意靈潤彌以隆赫奉今年
二月被州郡所下三年十二月辛酉詔書重賜安車衣

服別駕從事與郡功曹以禮發遣又時被璽書以臣為
光祿勳躬秉勞謙引喻周秦損上益下受詔之日精魄
飛散靡所投死臣重自省揆德非園綺而蒙安車之榮
功無竇融而蒙璽封之寵棠枕鴛下荷棟梁之任垂沒
之命獲九棘之位懼有朱博鼓妖之眚又年疾日侵有
加無損不任扶輿進路以塞元責望慕閭闔徘徊闕庭
謹拜章陳情乞蒙哀省抑恩聽放無令骸骨填於衢路
自黃初至於青龍徵命相仍嘗以八月賜牛酒詔書問

青州刺史程喜寧為守節高乎審老疾尪頓邪喜上言
寧有族人管貢為州史與寧比隣臣嘗使經營消息貢
說寧常著皂帽布襦袴布裙隨時單複出入閨庭能自
任杖不須扶持四時祠祭輒自力強改加衣服著絮巾
故在遼東所有白布單衣親薦饌饋跪拜成禮寧少而
喪母不識形象嘗特加觴泣然流涕又居宅離水七八
十步夏時詣水中澡洒手足闕於園圃臣揆寧前後辭
讓之意猶自以生長潛逸者艾智哀是以栖遲每執謙

退此寧志行所欲必全不為守高正始二年中書侍郎
王基薦寧於是安車蒲輪束帛加璧聘焉會寧卒

胡昭字孔明潁川人養志不仕始避地冀州亦辭袁紹
之命遁還鄉里太祖為司空丞相頻加禮辟昭往應命
既至自陳一介野生無軍國之用歸誠求去太祖曰人
各有志出處異趣勉卒雅尚義不相屈昭乃轉居陸渾
山中躬耕樂道以經籍自娛閭里敬而愛之徙宅宜陽
幽州刺史杜恕嘗過昭所居草廬之中言事論理辭義

謙敬恕甚重馬太尉蔣濟辟不就

張臻字子明鉅鹿人少游太學學兼內外後歸鄉里表
紹前後辟命不應移居上黨并州牧高幹表除樂平令
不就徙遁常山門徒且數百人遷居任縣太祖為丞相
辟不詣太和詔求隱學之士能消災復異者郡累上
臻發遣老病不行廣平太守盧毓到官三日綱紀曰承
前致版謁臻毓教曰張先生所謂上不事天子下不友
諸侯者也豈此版謁所可光飾哉但遣主簿奉書致羊

酒之禮

徐奕字季才東莞人避難江東孫策禮命之奕改姓名微服還本郡太祖為司空辟為掾後拜諫議大夫卒

王暢字叔茂少以清實為稱無所交黨初舉孝廉辭病不就

張楷字公超司隸舉茂才除長陵令不至官隱居弘農山中學者隨之所居成市後華陰山南遂有公超市五府連辟舉賢良方正不就漢安元年順帝特下詔告河

南尹曰故長陵令張楷行慕原憲操擬夷齊輕貴樂賤
竄跡幽藪高志確然獨拔羣俗前此徵命盤桓未至將
主者翫於常格優賢不足使其難進與郡使以禮發遣楷
復告疾不到建和三年下詔安車備禮聘之辭以篤疾
不行

楊厚字仲桓廣漢人潛身藪澤耦耕自給司徒楊震表
薦其高操公車下徵不就

蜀秦宓縣竹人少有才學州郡辟命輒稱疾不往劉璋

時宓同郡王商為治中從事與宓書曰貧賤困苦亦何
時可以終身卞和銜玉以耀世宜一來與州尊相見宓
荅書曰昔堯優許繇非不弘也洗其兩耳楚聘莊周非
不廣也執竿不顧易曰確乎其不可拔夫何銜之有且
以國君之賢子為良輔不以是時建蕭張之策未足為
智也僕得曝背乎隴畝之中誦顏氏之簞瓢詠原憲之
蓬戶時翱翔於林澤與沮溺之等儔聽玄猿之悲吟察
鶴鳴於九臯安身為樂無憂為福處空虛之名居不靈

之龜知我者希則我貴矣斯乃僕得志之秋也何困苦之戚焉及丞相亮領益州迎為別駕累遷至大司農卒楊慮字威方儀之兄也少有德行為江南冠冕州郡禮名諸公辟請皆不能屈年十七天鄉人宗貴號曰德行楊君

周舒字叔布少學術於廣漢楊厚名亞董扶任安數被徵不詣

吳張紘字子綱少游學京都還本郡舉茂才公府辟皆

不就

吳書曰大將軍何進太尉朱雋司空荀爽三府辟為掾皆稱疾不就

避難江東孫策

創業表為正議校尉後權以為長史

晉郭象字子玄少有才理州郡辟召不就嘗閒居以文論自娛後辟司徒掾稍至黃門侍郎東海王越引為太傅主簿卒

李喜字季和上黨銅鞮人父佺漢大鴻臚喜少有高行博學研精與北海管寧以賢良徵不行累辟三府不就及景帝輔政命喜為大將軍從事後累遷至尚書僕射

特進拜光祿大夫以年老遜位

徐苗郡察孝廉州郡從事治中別駕舉異行公府五辟
博士再徵並不就武惠時以疾居臺帝輒訪其安不終
於家

汜毓濟北盧人奕世儒素或薦之武帝召補南陽王文學
祕書郎太傅參軍並不就于時青土隱逸之士劉兆
徐苗等皆務教授惟毓不蓄門人清靜自守時有好古
慕德者諮詢亦傾懷開誘以一隅示之七十一而卒

孫綽字興公博學善屬文少與高陽許詢俱有高尚之志居於會稽游訪山水十有餘年後徵為太學博士累轉至廷尉卿領著作卒

皇甫謐字士安安定朝那人沉靜寡欲始有高尚之志以著述為務自號玄晏先生著禮樂聖真之論後得風痺猶手不輟卷或勸謐修名廣交謐以為非聖人孰能兼存出處居田里之中亦可以樂堯舜之道何必崇接世利事官鞅掌然後為名乎作玄守論以答之魏郡名

上計掾舉孝廉景元初相國辟皆不行其後鄉親勸令
應命謚為釋勸論以通志焉其後武帝頻下詔敦逼不
已謚上疏自稱草莽臣曰臣以疋僉迷於道趣因疾抽
簪散髮林阜人綱不閑鳥獸為羣陛下披榛採蘭并收
蒿艾是以臯陶振褐不仁者遠臣惟頑蒙備食晉粟猶
識唐人擊壤之樂宜赴京城稱壽闕外而小人無良致
灾速禍久嬰篤疾軀半不仁右脚偏小十有九載又服
寒食藥違錯節度辛苦荼毒於今七年隆冬裸袒食水

當暑煩悶加以咳逆或若溫瘧或類傷寒浮氣流腫四
支酸重於今困劣救命呼噏父兄見出妻息長訣仰迫
天威扶輿就道所苦加篤不任進路委身待罪伏枕歎
息臣聞韶衛不並奏雅鄭不兼御故郤子入周禍延王
叔虞兵稱賢樊姬掩口君子小人禮不同器况臣糠粃
糲之彫胡庸夫錦衣不稱其服也竊聞同命之士咸以
畢到惟臣疾疚抱釁牀褥雖貪明時懼斃命路隅設臣
不疾居遭堯舜之世執志箕山猶當容之臣聞上有明

聖之主下有輸實之臣上有在宥之政下有委情之人
惟陛下留情垂恕更旌瓌俊索隱於傅巖收釣於渭濱
無令泥滓久濁清流謚辭切言至遂見聽許歲餘又舉
賢良方正並不起咸寧初又詔曰男子皇甫謐沉静履
素守學好古與俗流異趣其以謚為太子中庶子謚固
辭篤疾帝初雖不奪其志尋發詔徵為議郎又詔補著
作郎司隸校尉劉毅請為功曹並不應

劉實字子真平原高唐人也漢濟北惠王壽之後父廣

斥丘令實少貧苦賣牛衣以自給然好學手約繩口誦
書博通古今清身潔已行無瑕玷郡察孝廉州舉秀才
皆不行後入雒調為河南尹丞至懷帝時為太尉

郤說字廣基博學多才瓌偉倜儻不拘細行州郡禮命
並不應

王接字祖游馮牧薦接於江東太守劉原即時禮命接
不受原乃呼見曰君欲慕肥遯之高邪對曰接薄祜少
孤而無兄弟母老疾篤故無心為吏及母終柴毀骨立

居墓次積年

王長文字德獻廣漢郫人少以才學知名而放蕩不羈州府辟命皆不就州辟別駕乃微服竊出舉州莫知所之後於成都市中蹲踞齧胡餅刺史知其不屈以禮遣之閉門自守不交人事太康中蜀土荒饑開倉振貸長文居貧貸多後無以償州郡切責送長文到州刺史徐幹捨之不謝而去後成都王穎引為江源令梁王彤為丞相以為從事中郎卒

劉兆字延世濟南東平人博學洽聞武帝時五辟公府
五徵博士皆不就安貧樂道潛心著述不出門庭數十
年後以壽終

杜夷博覽百家筭歷圖緯靡不畢究寓居汝潁之間十
載足不出門年四十餘始還鄉里閉門教授生徒千人
惠帝時三察孝廉州命別駕永嘉初公車徵拜博士太
傅東海王越辟並不就

范喬字伯孫父粲字武威粲陽狂不言喬與二弟並棄

學業絕人事侍疾家庭至祭沒足不出邑里司隸校尉
劉毅嘗抗論於朝庭曰使范武威疾若不篤是為伯夷
叔齊復存於今如其信篤益是聖主所宜哀矜其子久
侍父疾名德著茂不加叙用深為朝庭惜遺賢之譏也
元康中詔求廉讓冲退履道寒素者不計資以參選叙
尚書郎王琨乃薦喬曰喬稟德真粹立操高潔儒學精
深含章內奧安貧樂道栖志窮巷簞瓢詠業長而彌堅
誠當今之寒素著厲俗之清彥時張華領司徒天下所

舉凡十七人於喬持發優論又吏部郎郝隆亦思求海
內幽遁之士喬供養衡門至於白首於是除樂安令辭
疾不拜喬凡一舉孝廉八薦公府再舉清白異行又舉
寒素一無所就

伍朝字世明武陵漢壽人少有雅操閑居樂道不修世
事性好學以博士徵不就刺史劉弘薦朝為零陵太守
主者以非選例不聽尚書郎胡濟奏曰臣以為當今資
喪亂之餘運承百王之遺弊進趨者秉國政以僥倖守

道者懷蘊匱以終身故令敦褒之化虧退讓之風薄案
朝能游心物外不屑時務守靜衡門志道日新年過耳
順而所尚無虧誠江南之奇才丘園之逸老也不加飾
進何以勸善且白衣為郡前漢有舊宜聽光顯以獎風
尚奏可而朝不就終於家

虞喜少立操行博學好古諸葛恢臨郡屈為功曹察孝
廉州舉秀才司徒辟皆不就元帝初鎮江左上疏薦喜
懷帝即位公車徵拜博士不就喜邑人賀循為司空先

達貴顯每詣喜信宿忘歸自云不能測也太寧中與臨海任旭俱以博士徵不就復下詔曰夫興化致政莫尚乎崇道教明退素也喪亂以來儒雅陵夷每覽子衿之詩未嘗不慨然增歎臨海任旭會稽虞喜並潔靜其操歲寒不移研精墳典居今行古志操足以勵俗博學足以明道前雖不至其更以博士徵之喜辭疾不赴咸和末詔公卿舉賢良方正直言之士太常華恒舉喜為賢良會國有軍事不行咸康中內史何充上疏曰臣聞二

八舉而四門穆十亂用而天下安徽猷克闡有自來矣
方今聖德欽明思恢遐烈旌輿整駕俟賢而動伏見前
賢良虞喜天挺貞素高尚邈世束脩立德皓首不倦加以
傍綜廣深博聞強識鑽堅研微有弗及之勤處靜味道
無風塵之志高枕柴門怡然自足宜使蒲輪紆衡以旌
殊操一則翼贊大化二則敦勵薄俗疏奏詔曰潯陽翟
湯會稽虞喜並守道清貞不營世務耽學高尚操擬古
人往雖徵命而不降屈豈素絲難染而搜引禮簡乎政

道須賢宜納諸廊廟其並以散騎常待徵之又不起年七十六卒

任旭字次龍元帝初鎮江東聞其名召為參軍手書與旭欲使必到旭固辭以疾帝進位鎮東大將軍復召之及為左丞相辟為祭酒並不就卒於家



冊府元龜卷七百七十八